

## Za Europu regionow

**Njebjelčicy** (SN). Ze zjawnym listom wobroća so iniciatiwa Serbski sejm na prezidenta komisije EU Jeana-Claudea Junckera, zo by sej žadała diskusiju wo „Europje regionow“. Wčera je medijam wotpowědny list sposrědkowała.

Přičina lista je tuchwilna kriza Europskeje unije, kotraž wuwabja generelnu diskusiju wo přichodže zhromadženstwa. Serbski sejm je nastork pjeć móžnych opcijow zestajał a je na přikład w interneće wozjewił. Najzaměrnša opcija je Europa regionow, kotraž zmóžnja eficientne regionalne zarjadnistwo z wjac wěcownej kompetencu, při čimž je wobydlerjej bliska.

Sejmikarjo zasadžeja so za Europu ze zhromadnymi zaměrami a zakładami. K tomu su po regionach wšelakore puće předstajomne. Tohodla měli so na městnje rozjimać a postajić. Europa pak ma wažnu rólu nastupajo wuměnu nazhonjenjow přewzać. „Europa regionow je prawa wotmołwa na potřebnosće džensnišeho Europjana. Wón je informowany a chce sobu tworić. Tule šansu měli wužić. Wobydlerjam bliska Europa móže EU wožiwić“, měni delnołužiski rěčnik iniciatiwy Serbski sejm a předsyda Łužiskeje aliancy Hanzo Wylem-Kell.

W tymle zwisku měli tež w rozšěrjenej Europje zaso na konsens orientowane diskusije a wothłosowanja zawjesć. Wobzamknjenja wjetšiny měli wotstronić, wšako čuja so předewšěm mjeńše kraje a regiony wobšudžene.

Sejmikarjam pobračuje tuchwilu zjawna, na problemy a zaměry wusměrjena analiza z prašenjom: Štó přeje sej što a z čim je njespokojom? Iniciatiwa Serbski sejm tuž Junckera namołwja, wuslědkam wotewrjenej diskurs z wobydlerjami Europy zahajić.